

Transkript konferencije za medije međunarodnih organizacija

OHR, Kevin Sullivan

OSCE, Zinaida Delic

EUPM, Alun Roberts

OHR

Danas, i do kraja ove sedmice, visoki predstavnik će učestvovati u nekoliko radio razgovora u vezi sa reformom policije. Visoki predstavnik namjerava da pojasni debatu o reformi policije. Važno je da svi razumiju šta su ovdje pitanja – a šta nisu.

Kod restrukturiranja policije radi se o uklanjanju politike iz policije. I radi se o stvaranju efikasnije policije. To može biti postignuto samo uklanjanjem stvari koje spriječavaju policiju u obavljanju svog posla, kao što su:

- nedovoljno finansiranje,
- neracionalna organizacija i
- političko uplitanje.

Uspješna reforma policije također će imati pozitivan uticaj na razna srodna područja. Evropska komisija je rekla da je uspostavljanje efikasnog i demokratskog sistema policije na državnom nivou preduvjet za daljnji napredak prema eventualnom prijemu u EU.

Bez restrukturiranja policije ne može biti promjena u režimu izdavanja EU viza za građane BiH.

U vezi s tim, upravo smo saznali da Predstavnički dom

Federacije BiH nije usvojio Zakon o policijskim službenicima koji je usaglašen sa Ministarstvom unutrašnjih poslova FBiH, direktorom policije FBiH, EUPM-om i OHR-om i u skladu je sa principima Evropske komisije za reformu policije.

Ovaj zakon je velika komponenta u naporima za unaprijeđenje policije u ovoj zemlji i OHR poziva parlamentarce da prevaziđu prepreke i osiguraju brzo usvajanje. Čitavo pitanje u vezi s ovim zakonom i reformom policije u osnovi je veoma jednostavno.

Uklonite politiku iz rada policije. Učinite policiju profesionalnom. Dajte policiji harmonizirane radne uvjete, na primjer: plate, unapređenja i uvjete za unapređenje karijere. Učinite BiH sigurnijim mjestom za život. Dodajte ključni element za proces prijema BiH u Evropsku uniju.

OSCE

Ambasador Davidson prisustvuje seminaru na temu Međunarodna pravna saradnja u predmetima ratnih zločina

Ambasador Douglas Davidson, šef Misije OSCE-a u Bosni i Hercegovini, prisustvuje seminaru na temu "Međunarodna pravna saradnja u predmetima ratnih zločina", koji se održava danas u Stockholmu. Tokom seminara bit će nastavljeno sa razgovorima koje su započeli stručnjaci na sastanku o među-državnoj saradnji na predmetima ratnih zločina, održanom u organizaciji OSCE-a, na Paliću (Srbija i Crna Gora), u novembru prošle godine.

Razgovori će se fokusirati na utvrđivanje prepreka, kao i na iznalaženje konkretnih rješenja za razvoj i primjenu efikasne preko-granične saradnje sudova na procesuiranju predmeta ratnih zločina. Učesnici će također raspravljati o prenosu predmeta na lokalne sudove, suđenjima za ratne zločine iniciranim od strane domaćih organa, kao i o problemima

domaćeg pravosuđa, a koje se odnose na ispunjavanje međunarodnih normi za fer i pravovremeno suđenje.

Ambasador Davidson će iskoristiti ovu priliku da podsjeti sve prisutne na važnost rada okružnih i kantonalnih sudova u BiH prilikom gonjenja ratnih zločina, kao i na to da su entitetski sudovi bili integralni dio regionalne saradnje.

Domaćin seminara je Folke Bernadotte Akademija, zajedno sa švedskim Ministarstvom vanjskih poslova. Uz predstavnike OSCE-a, na seminar su pozvane sudije, tužioci, i predstavnici vlada Bosne i Hercegovine, Hrvatske, i Srbije i Crne Gore.

Online intervju sa ambasadorom Davidsonom

Misija OSCE-a u BiH će organizirati online intervju sa ambasadorom Douglasom Davidsonom, šefom Misije, 24. februara, između 16.00 – 17.00 sati.

Ambasador Davidson će biti na raspolaganju da odgovori na pitanja građana BiH, a koja se odnose na rad OSCE-a u ovoj zemlji. Svi zainteresirani se mogu logirati na www.oscebih.org, kako bi postavili pitanje o reformi obrazovanja; o tome kako se studenti mogu uključiti u to; kako općinska administracija može bolje funkcionirati; kako građani mogu utjecati na proces donošenja odluka; ili samo da bi dali svoj komentar ili prijedlog.

Molimo vas da imate na umu da svi oni koji ne mogu biti online u to vrijeme, da će stranica na koju mogu postavljati svoja pitanja biti otvorena između 09.00 i 17.00 sati, 24. februara 2005.

EUPM

Prevod nije dostupan.

OHR:

Ima li pitanja?

Feda Forto, Fena:

Jedno pitanje. OHR je bio izričito, na prošlome brifingu, se izjasnio protiv ovoga zakona o privilegijama poslanika u parlamentu. Da li ćete insistirati na tome pitanju zato što se, koliko sam ja razumio, u parlamentu samo nastoje preformulisati zakonski prijedlozi u odnosu na onaj prošli?

Kevin Sullivan, OHR:

Dakle, izjava koju je OHR dao bila je veoma jasna i mislim, relativno jednostavna, i kako se ovo dešava u vrijeme kada je stopa siromaštva u Bosni i Hercegovini visine te koje i jeste, svaki izabrani zvaničnik mora sagledati umjesnost povećavanja plata. Neću špekulirati o tome kakva će biti reakcija OHR-a na posljednje promjene, ali suštinsko pitanje i suštinski stav OHR-a ostaje isti, i mislim da je to stav mnogih ljudi u Bosni i Hercegovini, a to je da tek kada se ekonomija stavi na put potpunog oporavka i kada se standard življenja, sveobuhvatno, počne poboljšavati, će biti vrijeme da se počne pričati o povećavanju plata parlamentaraca, ali nikako prije toga.